

# PM jamin skim gaji penjawat awam jadi keutamaan kerajaan

Kadar upah lebih kompetitif akan dibincang selepas pendapatan negara bertambah

Oleh Irwan Shafrizan Ismail  
bhnews@bh.com.my

**Putrajaya:** Datuk Seri Anwar Ibrahim memberi jaminan, skim gaji penjawat awam akan menjadi keutamaan kerajaan, apabila pendapatan negara bertambah.

Bagaimanapun, Perdana Menteri berkata, perkara berkaitan skim gaji itu tidak mungkin dapat dilaksanakan dalam masa terdekat.

“(Penjawat awam) tanya mengenai skim gaji, itu bila pendapatan negara bertambah, skim gaji jadi keutamaan penjawat awam, insya-Allah.

“Untuk bulan ini agak mungkin (tidak mungkin) pak,” katanya pada Perhimpunan Bulanan bersama warga Jabatan Perdana Menteri (JPM) di sini, semalam.

Sebelum ini, CUEPACS menggesa kerajaan memberi jaminan padu kepada penjawat awam untuk mencari jalan menyediakan skim gaji dan upah yang lebih kompetitif kepada mereka.

Menyifatkan permintaan CUEPACS itu bukanlah bermakna ia perlu dilaksanakan serta-merta, Presidennya, Datuk Adnan Mat, berkata sebahagian daripada penjawat awam terutama dalam kumpulan sokongan, membabitkan keluarga berpendapatan rendah dan perlu dibantu.

Susulan kenyataan CUEPACS itu, Perdana Menteri berkata, kadar gaji dan upah penjawat awam akan dibincang semula setelah kedudukan kewangan negara bertambah baik, selain defisit kewangan negara dapat dikurangkan.

Perdana Menteri mengakui, secara peribadi, beliau juga tidak berpuas hati apabila melihat gaji dan upah semasa penjawat awam ketika ini, berbanding tugas serta komitmen yang diberikan.

Dalam pada itu, Anwar turut memaklumkan akan memberi-



Anwar bersama timbalannya, Datuk Seri Fadillah Yusof (kiri) dan Ketua Setiausaha Negara, Tan Sri Mohd Zuki Ali (kanan) pada Perhimpunan Bulanan bersama warga JPM di Putrajaya, semalam. (Foto Mohd Fadli Hamzah/BH)

kan beberapa gambaran positif, termasuk hasil dan pendapatan negara pada sesi penggulungan di Dewan Rakyat pada Khamis ini.

“Tapi insya-Allah hari Khamis dalam penggulungan, bagi pihak Jemaah Menteri, saya akan gulung.

“Bagi pihak JPM dan Kementerian Kewangan, selain daripa-

da yang sudah dibuat menteri-menteri, saya akan memberi beberapa gambaran yang sangat positif, baik dari segi hasil kita, pendapatan negara, jumlah pelaburan yang ‘real’, ini bukan MoU (perjanjian persefahaman) ya, ada orang kata ada beza MoU dengan MO Do.

“Jadi kalau saudara yang senior yang pernah berada di

MITI, tahu pengumuman pelaburan RM30 bilion, tapi kadang-kadang dua tahun tidak sampai lagi.

“Jadi sebab itu saya setuju dengan rakan Jemaah Menteri, elok kita gunakan kaedah berbeza untuk menyatakan apa yang berlaku bulan ini atau bulan-bulan berikutnya dari segi tindakan,” katanya.